

मनैयक मन

परमेश्वरक मन्दिर कि शैतानक ड्यारा?

यी कौनो लौव किताब नैहो। यी किताब दुइ सय वर्ष आघ सबसे पैल्ह फ्रान्स देशम प्रकाशित हुइल् ओ यी पहर्क हजारौं मनै आशिष पैल। मनै यी किताब पहर्ल त, परमेश्वर हुँकन्हक मनह छर्लङ्ग देखर्लजसिन हुँकन लगलन, काजेकलसे यी किताब हुँकन्हक जीवनम आत्मिक ऐनक रुपम काम करल। यी किताब पहर्क धेर मनै आपन मनह पापी देख्ल। दोस्र हुँक आपन-आपन पापी मन घुमाक परमेश्वरकठे अइल ओ लौव जीवन पैलक अनुभव कर्ल।

यी किताब पह्रबेर कृपया यहीह आपन मन हेर्ना ऐना समझक पही। अप्न चाहा ख्रीष्टीयन हुई, चाहा अख्रीष्टीयन हुई, चाहा बिग्रल ख्रीष्टीयन हुई, चाहा ज्या धर्म मानी, अप्न आपन मनक तस्वीर अपन्हे देखुइयाबाटी। अप्नह परमेश्वर देख्डीबाटजसिन लगुइयाबा। परमेश्वर किहुह पक्षपात नैकर्ट, उहाँ त मनैन्हक मन हेठ।

शैतान मनैन झुट ब्वाल लगैठा, मनैन पापम फँसैठा, मनैन झुकैठा, स्वर्गदूतक भेष धारण कर्ठा। धेर मनै शैतानह जाट्टीक स्वर्गदूत सम्झठ ओ वाकर वास्तविकता देखादेलक बात मन नैपरैट। धेर वर्ष आघकअस आजकाल फे येशू ख्रीष्टक चेला हुइल् भेष लेक नेङ्गुइयन नक्कली चेलावँ धेर बाट ओ हुँकहे ख्रीष्टह धवाखा देहुइयन हुइट। यिहाँ अचम्म मानपर्ना खास लौव बात कुछ नैहो, काकरकि शैतान अपन्हे स्वर्गदूतक भेष धारण कैराखल। परमेश्वरक प्रेम, उहाँक महानता, ओ आपन उद्धारकर्ता येशू ख्रीष्टह मनै नैदेखहीं, ओ देखना चाहना फे नैकरहीं कैक शैतान मनैयक मनह ओ आँखह आन्धर बनादेराखल। सक्कु पापी मनै ओ परमेश्वरकूम विश्वास नैकर्ना मनै आन्धर ओ मुवल बराबर बाट। हुँकन्हक जीवनम शैतान शासन कर्टीबाटन। आपन पतन हुइल् अवस्था द्याखक लाग आँख नैउग्रट्सम हुँक अनन्त विनाशओर जैटीरठ। “मै पापी नैहुइटुँ” कना मनै अपन्हेह धवाखा देठ।

जब अप्न यी किताब पहर्बी ओ यिहींम रहल चित्र मजासे निहारक हेर्बी, तब अप्न आपन मनह छर्लङ्ग द्याखसेकुइयाबाटी। अप्न परमेश्वरक आघ आपन मनह खुलस्त बनाई। आपन पाप स्वीकार करी ओ “मै पापी नैहुइटुँ” जिन कही, काकरकि परमेश्वरक वचनम असिक लिखल बा “यदि हम्न कबु फे पाप नैकर्टी कैक कठी कलसे, हम्न अपन्हेह धवाखा देठी, ओ परमेश्वरक देखाइल सत्य बात हम्न नैजन्टी। यदि हम्न आपन-आपन पाप स्वीकार कर्ली कलसे, उहाँ हमार करल सब पाप कामक क्षमा देठ, ओ हमार चरित्रम सुधार आन्क हमन उहाँक आघ ग्रहणयोग्य बनैठ, काकरकि उहाँ मनै आपन पाप स्वीकार कर्ल कलसे हुँकन क्षमा देना बाचा कैरखल ओ उहाँ आपन करल बाचा पूरा करुइया विश्वासयोग्य परमेश्वर हुइट।” हमार सारा पापक दाग मेटैना चिज कलक परमेश्वरक छावा येशू ख्रीष्टक रगत हो।

अप्नक जीवनम कि त शैतानक राज्य बा कि त परमेश्वरक राज्य बा। अप्न या त शैतानक अधिनम बाटी या त परमेश्वरक अधिनम बाटी। यदि अप्नकूम पाप राज्य जमैल बा कलसे, मुहम दही जिन जमाई, बेनसे परमेश्वरह पुकारा करी। उहाँ आपन पुत्र येशू ख्रीष्टद्वारा अप्नह छुटकारा दिहक लाग तयार बाट। काकरकि येशू ख्रीष्ट खासकैक शैतान ओ पापक शक्तिह हराक पापी मनैन बँचाइक लाग यी संसारम अइलह। उहाँ जो हमार मुक्तिदाता हुइट। अप्न पवित्र परमेश्वरक उपस्थितिम बाटी। परमेश्वर अप्नक जीवनक सब रहस्यक बात, अप्नक मनक विचार द्याख ओ बुझसेकठ। अप्न अपन्हेह

ओ आपन कामह परमेश्वरक नजरसे नुकाइसेकुइया नैहुइटी, काकरकि “जे कान बनैल उहाँ अपन्हे नैसुन्ट का? जे आँख बनैलह उहाँ अपन्हे नैदेखट का?”

“परमेश्वरकूम भरोसा कर्ना मनैन सहायता ओ सान्त्वना दिहक लाग सारा पृथ्वीभर उहाँक नजर पलरठन।”

“परमेश्वरक नजर मनैन्हक चालम पलरठन, हुँकन्हक हर पाइला उहाँ देखटीरठ। दुष्ट मनै उहाँक नजरसे नुकसेक्ना अन्धार ठाउँ कहाँ फे नैहो।”

“तर येशू अपन्हे सबजहन चिन्हलकओसे उहाँ हुँकन हुँकन्हक विश्वासम नैछोर्ला।”

उहओसे “पाप ओ अपराध क्षमा पैलक मनैया धन्यक हो। परमेश्वर जेहीसे वाकर खराब कामक हिसाबकिताब नैमड्ट उ मनैया धन्यक हो, ओ मनम छल नैरहल मनैया धन्यक हो।” येशू आज आव फे मनैन बलैटीबाट, “धर्मकर्मक गम्हीर भन्वा ब्वाकट्-ब्वाकट् डटकरल सब जन म्वारठे आओ, मै तुँहन शान्ति देहमा”

चित्रक व्याख्या

पहिल चित्र

यी चित्र लौव जीवन नैपाइल एकठो पापी मनैयक मनह देखैठा। बाइबलम बयान कैगैलअस वाकर जीवनम शारीरिक अभिलाषा राज्य जमैल बाटस। परमेश्वर मनैयक मनह देखना वास्तविक चित्र यिह हो। लाल-लाल आँख धेर मत्वार हुइलक संकेत हो। परमेश्वरक वचनम लिखल बा, “क्याकरम दुख परिअइठा? शोक केहीह करपठा? झग्राझाँटी के कठा? कुलतम के फँस्टा? क्याकर आँख लाल-लाल रठा? बर्कारात लाग जाँरडारू पिटिरना मनैन्हक आँख लाल-लाल रठन। जब मतोरेन हटमटैठ, तब हुँकन जिन हेरो। हुँक विषाहा साँपअस डँस्ट। टुन्हक आँख नैचिन्हल चिज हेठा ओ टुन्हक मनमसे गलती विचार निस्कठा।”

यी चित्रम मुन्टक टर एकठो मनैयक मन देखागैल बा, जहाँ धेर किसिमक जीवजन्तु बास कैरखल। याकर मतलब मनैयक मनम धेर किसिमक पाप रठा कहल हो, काकरकि मन जो पापक किल्ला ओ अखडा हो। परमेश्वर उहाँक वचन बोलुइया व्यक्ति मार्फत असिक बोल्ठ, “मनैन्हक मन सबसे छली रठा, पापक कीरा उह मनम भरल रठ, ओसिन पापी मनह के जानसेक्ठा?” यिह बातह येशू इन स्पष्ट पर्लबाट, “यी सब चिज मनमसे निकठा: दुष्ट विचार, बेश्या काम, चोरी, हत्या, व्यभिचार, ल्वाभ, खराबी, छलकपट, छट्टैना काम, बिह मुना, बदनाम कर्ना, ओ घमण्डी ओ मूर्ख हुइना। ज्याकर मनमसे यी चिज अइठा, ओहीह परमेश्वर अपवित्र मन्ठा।”

१. मँजन्वा:- मँजन्वा धेर सुहावन चिरैयाँ हो, उहओसें सब जन याकर नाउँ उठैठा तर यिहाँ यी चिरैयाँ मनम घमण्डी ओ अभिमानी हुइना पापक संकेत कर्ठा। लुसिफर नाउँक स्वर्गदूत फैल्ह परमेश्वरक सबसे बरासेवक रह ओ परमेश्वरक गुण बोक्लरह। उ परमेश्वरक खबर पुगुइयन्हक बराहाकिम रह। घमण्डी हुइलक कारन उ स्वर्गमसे खेद्वापाइल्, असिक उ परमेश्वरक शत्रु, शैतान, हुइल्।

मनै विभिन्न तरीकाले घमण्ड कर्ठा। कुई आपन धनसम्पत्तिम घमण्ड कर्ठ, कुई उच्च शिक्षा हासिल कर्लकूम घमण्ड कर्ठ, कुई फेशनवाल लुगा लगैलकूम घमण्ड कर्ठ, हुँक फेशनक नाउँम लाज पचाक सलआड निस्कल लुगा लगैठा। कुई-कुई आपन गहना, चुन्या, मुन्द्रीम घमण्ड कर्ठा। कुई-कुई आपन पितापूर्खा, राष्ट्रियता, संस्कृति, खेल-तमासा आदिम घमण्ड कर्ठा। परमेश्वरक वचन, बाइबलम स्पष्ट लिखल बा, “परमेश्वर घमण्डी मनैन्हक विरोध कर्ठ तर नम्र मनैन दया देखैठा।” “नाश हुइनासे आघ घमण्ड ओ पतन हुइनासे आघ अभिमान अइठा।”

२. ब्वाक्या:- ब्वाक्या भोगबिलासम मत्ताइल जाटिक बोकबोकाइन गन्धैना जनाबर हो। यी अवैध शारीरिक सम्बन्ध, अनैतिकता, व्यभिचार, बेश्यकसँग लगना कामक प्रतिक हो। असिन भावनम उत्पन्न हुइना पाप आजकाल्हक जमानम धेर देखपर्ठा ओ बराहाली फैलटी जाइटा। “संसारक अन्त्य हुइना समयम मनैन्हक चाल सदोम ओ गमोरा शहरक मनैन्हकअस खराब चाल हुहीन” कैक लगभग २००० वर्ष आघ येशूक कहल बात सत्यसाबित हुइटीजाइटा। यी पाप थारू मनैन ओ जन्नी मनैन छुनासे लेक उद्योग, कलकारखाना, संघसंस्था, स्कूल, छात्रवास ओ मथमन्दिरम समेत पैँठल बा। शैतानक जालझेल ओ चलाकीले करबेर विनाश करैना पापक बीया खासकैक सिनेमा, नाच, अनैतिक, कथा, उपन्यास आदि साहित्यिक माध्यमद्वारा मनैन्हक मनम बोगैल् बा। परमेश्वरक नजरम पाप मानजैना चिजह आजकाल्हक मनै आधुनिक नैतिकता सम्झभिररल। लाखौँ युवा, युवतीहुँक सिनेमा ओ उपन्यासक आधारम आपन जीवनक लौव उद्देश्य बनैटीबाटा। असिक हुँकन्हक जीवनम संकट, लाज, शर्म ओ निराशाम जैटीबाटन। अनैतिक ओ अनुशासन नैरहल जीवन जीना सिनेमामक पात्र, खेलाडी, ओ नायक, नायिकाहुँक जो लौव पुस्तम चरित्रवान, बहादुर, ओ नाउँ चलल् मानजैठा। परमेश्वरक पवित्र व्यक्ति योसेफजसिन मनैयह आब कुई फे असल ओ चरित्रवान व्यक्तिक रुपम गन्ती नैकर्टा। जुलु जाति जसिन असभ्य समाजम फे व्यभिचारी मनैन मृत्युदण्ड देना चलन बाटन। असिन असभ्य जातिक मनै फे हमार सभ्य मानजैना समाजह कुछु-कुछु बात सिखाइसेकठ ओ न्यायक दिनम हमार विरोधम परमेश्वरक आघ हमन दोषी ठह्वाइसेकठ। परमेश्वरक कहाइ असिन बाटन, “व्यभिचारसे जिन खेलो तर ओहीसे दूर रहो।” “व्यभिचारसे अलग रहो। व्यभिचार बाहेक और सब पाप शरीरसे बाहार हुइठा, तर व्यभिचार करुइया मनै आप्न शरीरक विरोधम पाप कर्ठा। टुन्हक शरीर पवित्र आत्मक मन्दिर हो। टुह परमेश्वरसे पवित्र आत्मा पारख्लो कना बात का टुँहन थाहाँ नैहो? टुन्हक जीवनम परमेश्वरक अधिकार बाटन।” “यदि कुई परमेश्वरक मन्दिरह नाश कर्ठा कलसे, परमेश्वर फे ओहीह नाश करुइयाबाट, काकरकि परमेश्वरक मन्दिर पवित्र बा ओ उ मन्दिर टुहहे हुइटो।”

३. सुरा:- सुरा जुन जाँरडारु पिक मत्वार हुइना ओ घिनलगिक फुहर कामक संकेत कर्ठा। सुरा सफा ओ फुहर कुछु फे नैजानट्, काजेकलसे उ फुहरम खेल्ला जनावर हो। ओसहँक मनैयक पापी मन फे फुहर विचार, फुहर बोली, फुहर काम, फुहर सल्लाह, फुहर चित्र ओ फुहर साहित्यसे खेल्ला मन परैठा। मनै खैनी, चुरोट, माखुर, भाड, धतौर, गाँजा, चरेस, अफिम, जाँर, डारु जसिन फुहर चिज खाक परमेश्वरक बास कर्ना शरीररूपी यी मन्दिरह फुहर बनैटीबाटा। आजकाल मनै धुम्रपान ओ मद्यपानक कुलतम असिक फँसलबाट कि पैल्ह असिन कबु फे नैरह। असिन घिनलगिक कुलतम फँस्क शैतानक दास

बनल मनै परमेश्वरक शक्तिले केल छुटकारा पाइसेकठ। अपन्हेह धेर धर्मी देखाइचहना मनै मण्डलीम धुम्रपान कर्ना साहस नैकर्ट, काजेकलसे हुँक ओसिन काम पवित्र परमेश्वरक विरोधम हुइना काम हो कैक साँच्छ। तर फे हुँक चुरोटक गन्धैना ठूठले आपन शरीर फुहर बनाइ निहिच्छिकचैट। परमेश्वरक खास सत्य मन्दिर उह शरीर हो। पावल कठ, “टुन्हक शरीर पवित्र आत्मक मन्दिर हो कना बात का टुँहन थाहाँ नैहो? यी मन्दिरह जे नाश कर्ठा, ओहीह परमेश्वर नाश करुइयाबाटा।”

धेर खवास मनै फे परमेश्वरक नजरम घिनलगिटक रठ। हम्न जीएक लाग खैठी तर खाइक लाग नैजीटी। मजासे खाना खैलसे भुँख बटैठा, तर शरीरक अभिलाषा “आकुर चाहल, आकुर चाहल” कैक मङ्गटीरठा।

शरीरक अभिलाषा कबु फे पूरा नैहुइट, कबु फे नैअघाइट। पूरान नियमक व्यवस्थम खवास ओ जाँरडारु पिक एकदमसे मत्वार् रना मनैन पत्थले मुवैना बात बा। “जाँरडारुम बुर्लरना मनै ओ डलिङ्डर मनै कङ्गाल रठ ओ निनगङ्डर मनै फाटलचिँठल झुल्वा घलठ। झल्ला मनैन्हकसँग संगत कर्ना मनै आपन डाई-बाबन शरमम पठ।” एकठो धनी मनैया रह। उ जाटिक डलिङ्डर रह ओ आपन शरीरक अभिलाषक कमारा रह। एक दिन उ धनी मनैया मुवल ओ नरकूम गैल। जब उ मनैया नरकूमसे आँख उठाक ह्यारल त अप्न सहनैसेकना दण्डम परल द्याखल। मादक पदार्थ (अम्मल) खाक हुइना खराबीक बारेम सायद यिहाँ बयान कर्टीरह नैपरी। मादक पदार्थ असिन चिज हो कि यहीह खेलाँचीक रुपम लेबो-लेबो नैकरपरट। परमेश्वर आपन वचनम स्पष्ट रुपले कैरखल कि कौनो मतोन्या फे परमेश्वरक राज्यम जैना हक पउइया नैहो। जाँरडारु बनुइयन ओ बैचुइयन फे परमेश्वरक नजरम ओत्रह दोषी बाट, काकरकि परमेश्वर कठ, “जाँरडारु खैना ओ वाकर तेज बहैना मनैन्हकूम सराप परी।”

“आपन छिमेकीन विष मिलाइल जाँरडारु पियाक हुँकन लत्यास बनैना ओ हुँकन नङ्ग बनाक हेर्ना मनैन्हकूम सराप परी।” “हुँक राहरङ्ग करबेर मन्द्रा, झाली, विणा, सारङ्गी, बस्याबजैठ ओ जाँरडारु पिठ। तर हुँक परमेश्वरक काम नैदेखट। ओसिन मनै परमेश्वरक राज्यम जैना हक नैपैट कना बात का टुँहन थाहाँ नैहो? व्यभिचार करुइयन, मूर्तिपूजा करुइयन, लुच्चन, च्वार, लोभी, मतोरेन, डाँकन, ओ सब पापी मनै परमेश्वरक राज्यक हकदार हुउइया नैहुइट।”

पाप काम त स्पष्ट बा – व्यभिचार कर्ना, जीवनम पापक दाग लगैना, फटाहा काम कर्ना, मूर्तिपूजा कर्ना, मन्त्रतन्त्र कर्ना, झैझग्रा कर्ना, मत्वार् हुइना, ठग्ना, ढँठना, लुट्ना, लभर्ना आदि। असिन काम कर्ना मनै कुई फे परमेश्वरक राज्यक हकदार हुउइया नैहुइट। “जाँरडारु पिक जिन मत्ताओ, काकरकि जाँरडारु पिलसे शारीरक अभिलाषह बलगर बनादेठा, बेनसे पवित्र आत्मले भरिपूर्ण होओ।”

पियासल मनैन येशू असिक बलैठ, “यदि कुई पियासल बा कलसे, उ म्वारठे आक जीवन पैना पानी बिना म्वाल तिल्ल पिण।” “हे सारा पियासल मनै, पानीक लगघ आओ, पैसा नैरहल मनै फे आओ, ओ अङ्गुरिक रस ओ दूध बिना पैसक किन्क खाओ।” “म्वार देहल पानी पिउइया कुई फे प्यास मुउइया नैहो, बेनसे म्वार देहल पानी वाकर जीवनम मूल बन्क वाकरमसे सङ्भर बहटीरहूँस।”

४. खेचुइहया:- खेचुइहया आल्सी हुइना, आल्याटाल्या कर्ना या अल्याडमल्याड कर्ना, मन्त्रतन्त्र ओ टुनामुना कर्ना कर्लसे हुइना पापक संकेत कर्ठा। परमेश्वरकूम विश्वास नैकर्ना फे मन्त्रतन्त्रअसक पाप हो। “आल्सी मनै लालचम पठ, काकरकि हुँकन्हक हाँठ मेहनत नैकर्न। ओसिन मनै दिनभर लालचा केल कठ।” यहोशू इस्राएलक सन्तानन् कलह, “यी देश कब्जा करक लाग आल्सी जिन करो।” मनैन्हक स्वभाव परमेश्वरक आशिष पैनाम फे आल्सी कर्ठा ओ बरा सुस्त बा। येशू कल, “साँक्किर डगरओसे भित्तर जैना कोसिस करो।” “खोजो त भँटैवो।” स्वर्गक राज्यम बलजब्रीक हिसाबले नैहुइट। बलजब्री कर्ना मनै जबरजस्ती अछिन्क लेठ।

यदि हम उद्धार ओ आत्मिक वरदान सम्बन्धम आल्सी हुइली कलसे, हम्र बिनाशम पुगठी। हम्र आल्सी हुइली कलसे, प्रार्थना कर्ना, परमेश्वरक महत्वपूर्ण चिज खोजना ओ परमेश्वरक सबसे आशिषमय प्रतिज्ञा लेना कामम बाधा अइठा। असिक हम्र नाश हुइना डगरीम न्याङ्गपुगठी। परमेश्वरकम समर्पित हुइक लाग आज परमेश्वर अप्नह उत्साहित पारबेर शैतान अप्नक मनम यी काम काल कर्बी या और दिन फुर्सद हुई त कर्बी कना विचार डारदेठा। उ दिन कबु फे नैआइट ओ अप्न येशू ख्रीष्टकम विश्वास बिना कर्ल मुव फे सेकठी। परमेश्वर कठ, “यदि आज तुह उहाँक वचन सुनलो कलसे, आपन मन कठोर जिन पारो।” संसारम धेर मनै मुक्ति पाइक लाग येशूकम विश्वास कर्ना सुविधाजनक मौका खोज्ठी-खोज्ठी उ दिन बिना अइल मुरल।

तुनामुना ओ जादूगिरी करुइयन मन्त्रतन्त्र करबेर धेरजसिन खेचुइहेक खोक्ती प्रयोग कठ। सर्वशक्तिमान परमेश्वरकम विश्वास कर छोर्के हाँठ हेरैना, बिरा हेरैना, गुरैपाटी करैना पाप हो। जीवनम आपत्विपत्, दुखकष्ट, चाग, परीक्षा आदि परिआइल समयम आपन कर्म या भाग्यम भर परलसे त सर्वशक्तिमान परमेश्वरह पुकार पठा। यी बात परमेश्वरक वचनम स्पष्ट रुपम लिखल बा। उहाँ हमन सहायता करक लाग जब फे तयार बाटा। काकरकि “सज्जन मनैन्हक पैला परमेश्वर स्थिर कैदेठा।” बरा पद उत्तर, दक्षिण, पुरुब, पच्छिउँ कहाँसे फे नैआइट, तर परमेश्वर ठीक न्याय कठ। परमेश्वर इस्त्राएल देशक मनैन असिक आज्ञा देल, “तुहमध्ये कुई फे असिन काम जिन करहो – आपन छावा या छाईह आगिम होम कर्ना, हाँठ हेर्के भाग्य बटोइना, कुछ काम करक लाग पात्रा हेर्के साइत जुरैना, मन्त्रतन्त्र कर्ना, बोक्सिन लगना, इन्द्रजाल कर्ना, गुरैपाटी, धामीझाँक्री कर्ना, मसान जगैना, भूतबोक्सिन मनैना काम आदि, काकरकि परमेश्वरक नजरम यी सब काम घिनलगिटक काम हो।” “कुक्कुरजसिन स्वभाव रहल मनै, व्यभिचार कर्ना मनै, लभर्ना मनै, काला देखैना या चटक देखैना मनै परमेश्वरक राज्यम जाइ नैपैटा।” दुष्ट आत्मकओर आपन मन जिन लगाओ, भाग्य बटोइना मनैन्हक बात जिन सुनो, हुँकन्हक पाछ लागक आपन जीवन बर्बाद जिन पारो। “मै परमप्रभु तुहक परमेश्वर हुइहुँ।” “जब मनै तुँहन गुन्वा, धामीकठे जाक पुछो कठ, तब तुह परमेश्वरकठे जाक पुछ पर्ना नैहो का? जीवीत परमेश्वरक बारेम आत्मिक रुपले मुवल मनैनसे पुछना ठीक हो का? शिक्षा ओ चेतावनी रहल ठाउँम जाइपठा। यी हिसाबले नैचल्ला मनै बिहानक उठ पउइया नैहुइटा।”

यी छुटिमुटि किताब पह्रबेर परमेश्वर अप्नह कठ कि अप्न आपन पापी मन घुमाक परमेश्वरकठे आई ओ आपन जीवन उहाँक आघ समर्पण करी। तर अप्नक मनम बास कर्ना खेचुइहेक आत्मा अप्नकम विभिन्न किसिमक शंका उब्जादेठा ओ परमेश्वरकम विश्वास कर्ना मन फे डरले भरजैठा। “यदि मै ख्रीष्टीयन हुइम कलसे म्वार संघरेन, इष्टमित्रहुँक महीह का कहहीं?” “यदि मै पूजापाठ, सांसारिक हिसाबक नाचगान ओ भ्वाजभत्यारम सहभागी नैहुइम कलसे, महीह का हुई?” ख्रीष्ट येशूकम विश्वास कर्लसे पैना आत्मिक धन, अचम्मक शान्ति, असिम आनन्द, चरम सुख ओ अनन्त जीवन द्याख छोर्के अप्न संसारक राहरङ्गक बात केल द्याखभिठी। उ त ख्रीष्टकम विश्वास करबेर त्याग करपर्ना बात हो। येशू ख्रीष्ट त मृत्युक कब्जम परल मनैन छुटकारा देहक लाग अइलह। खेचुइहेकअस अप्नकम रहल आल्याटाल्या कर्ना भावना अप्नक मनह खेचुइहेक खप्टीअस आँक्खर बनैटीलैजैठा।

५. बध्वा:- बध्वा एकठो डरलगिटक ओ हिंसक जनावर हो। अक्सर कैक मनैन्हक मनम डाह, रिस जसिन हिंसात्मक चिजले अड्डा जमैल रठा ओ ओसिन चिजले मनैन्हक मनम हिंसात्मक भावना जगादेठा। अप्नक मनम रहल हिंसात्मक भावना फुटक चकनाचूर नैहुइत्सम, अप्न ओहीह अधीन कर्लरना कोसिस करसेकठी। अप्नक मनम रिस बा कना बात स्वीकार कैक उहींमसे छुटकारा पाइक लाग येशूसे विन्ती कर्ना मजा हुई। “आब सूर्ता जिन करो, आपनपर अपन्हे जिन रिसाओ।” “रिस कर

छोरदेओ, काकरकि रिस मनैन खराब कामओर लैजैठा।” “रिसाइल मनै दया नैकर्ट, पक्खोम भल बहअस मनैन्हक मनम रिस बहठा, रिसले अन्धवाइल मनैन्हक सामुन्नेम के परसेकी?” “आपन मनम रिस जिन बोको, काकरकि मनम रिस बोकुइयन त मूर्ख हुइटा” उहमार आपन मनमसे रिस हटाओ।

धेर मनै जाँरडारु पिक या बदला लेक आपन रिसह शान्त पर्ना कोसिस कठ तर “जाँरडारु त साँपन्हक विषअसक चिज हो” कना बात हुँक नैजन्टा। पापी मन बदला लेना काम खूब मन परैठा। तर बदला लेहुइया त परमेश्वर हुइटा। येशू कल, “आपन छिमेकिन अपन्हेहअस प्रेम करो।” हमार विरोधम पाप करुइयन यदि हम्र क्षमा देली कलसे, परमेश्वर हमार पाप क्षमा कर्ना प्रतिज्ञा कैरखल। छुल्याहा ओ मनमन गनगनैना आत्मा फे परमेश्वरक नजरम घिनलगिटक हो। हिंसा, हत्या कर्ना जसिन खराब भावना मनम बास कठा। उहओसे असिन खराब भावनमसे छुटकारा पाइक लाग मनैन्हक मन पवित्र हुइपर्ना आवश्यक बा।

६. सँप्वा:- परमेश्वर शुरुम आपन बनाइल मनैन, आदम ओ हब्बह, एकठो सुन्दर फुलन्यम बैठैल। उ फुलन्या अदन कना ठाउँम रहा। उहओसे उ फुलन्यह अदनक फुलन्या कहँट। हुँक एकदम सुख ओ आनन्दम रलह। हुँक उ फुलन्यम परमेश्वरसे संगती करँट। परमेश्वरसे हुँकन्हक मजा सम्बन्ध स्थापित हुइल् देखक शैतान डाहा करल। तबदोस्र शैतान हुँकन नाश कर्ना जुक्ति लगाइल। परमेश्वरसे स्थापित हुइल् हुँकन्हक मजा सम्बन्ध, मेलमिलाप ओ संगतीह उ बिगारदेहल्। शैतानकमसे अइना यह डाहा कर्ना भावना सुख ओ आनन्दम रहल मनैन्हक मनह बिग्रादेठा। “डाहा कर्ना मनैन्हक मनम एक दया नैरटन।” हुँकन्हकम खराब विचार अइलकओसे हुँक आनक सुख, शान्ति ओ आनन्दह बिग्रादेना काम कठ। डाहले मनैन आनक हत्या कर्नासम फे पुगैठा। डाहा अखीष्टीयन मनैन्हक मनम केल नैहोक खीष्टीयन अगुवा, पाष्टर, प्रचारक ओ सेवकहुँकन्हक मनम फे अइना घिनलगिटक चिज हो। उहओसे हम्र सड्डभर होशियार हुइपर्ठा। मनैन्हक मन पवित्र परमेश्वरक मन्दिर हो, जहाँम परमेश्वरक प्रेम भरल रहपर्ठा। यी मन्दिरह फुहर बनाइक लाग शैतानकमसे अइना सब चिज हटाइपर्ठा। फुहर मनक मनैनसे परमेश्वरक सम्बन्ध नैरटन ओ फुहर मन्दिरम परमेश्वर बास नैकर्ट।

७. बेङ्गवा:- बेङ्गवा ल्वाभ कर्ना पापक संकेत कठा। रुप्या-पैसक ल्वाभ कर्ना काम सब किसिमक खराब कामक जर हो। मनै धेर धनी हुइना चाहना कर्ल कलसे, हुँक ठग्ना, चोर्ना, लभर्ना, हेल्हा कर्ना, डाहा कर्ना, झग्रा कर्ना ओ मनैन मुवैना काम फे करसेकठ। रुप्या-पैसक ल्वाभ कर्लसे और पापक शुरु हुइठा। कङ्गो कना देशम असिन बेङ्ग फे पत्ता लागल बाट कि उ बेङ्ग भुर्र फुटक नैमुवटसम खाको खाइ कर्तीरठा। लोभी मनै असिन रठ कि हुँकन्हक मनम गरीब, दुखी मनैन दया कर्ना भावना फे नैजगटन। हुँक जसिक हुइलसे फे यी संसारक धनसम्पत्ति कुहेइना काम कठ, जौन सम्पत्तिम कीरा लगठ। येशू कल, “आपन लाग पृथ्वीम धनसम्पत्ति जिन कुह्याओ, जहाँ च्वार चोरदेठ, कीरा खादेठ, खै लागजैठा, तर आपन धनसम्पत्ति स्वर्गम जम्मा करो, जहाँ च्वार ओ कीरा नैरट ओ खै फे नैलागट। जहाँ टुन्हक धन रठा, उहँ टुन्हक मन रठा।” आकान नाउँ रहल मनैयह आनक स्वान, चाँदी ओ लुगाफाटक ल्वाभ लगलस्। उ च्वारल, दोस्र परमेश्वर ओहीह ओ वाकर घरपरिवारक सब मनैन नाश पर्ल। येशू खीष्टक चेला, यहूदा इस्करियोत, रुप्या-पैसक ल्वाभम पर्क येशूह ध्वाखा देहल्। तबदोस्र उ अपन्हे गरझुल्क मुगैल। यिहाँ खास दोष पैसक नैहुइटस तर पैसक ल्वाभ हो, पैसह धेर प्रेम कर्लक कारण हो। यी ल्वाभ कना चिज मनैन्हक मनम नुकल रठा।

सक्कु जाति, सक्कु वर्ग, सक्कु समाजक हजारौँ मनैन्हक मनम एकठो एकदम बलगर चाहना रठन। उ चाहना का हो कलसे, तुरुन्त धनी हुइना चाहना हो। जुवातास खेल्क हुइठा कि, चोर्क हुइठा कि, डाँका मार्क हुइठा कि, लुटपिट कैक हुइठा कि, मनैन मुवाक हुइठा कि, कि का कैक हुइठा? ज्या कैक

हुइलसे फे (परिश्रम बिना कर्ल) तुरुन्त धनी हुइना एकदम बलगर चाहना मनैन्हक मनम नुकल रठा। रुप्या-पैसक प्रेम, ओ शक्ति ओ अधिकारक प्रेम एकदम खराब चिज हो। शक्ति कलक आनकम शासन कर्ना राजनैतिक शक्ति फे हुइसेकी, गरीब मनैन थिचोमिचो कर्ना आर्थिक शक्ति फे हुइसेकी, धर्मक आधारम औरजहन दबैना धार्मिक शक्ति फे हुइसेकी। असिन शक्ति परमेश्वरक नजरम खराब हो। परमेश्वरह कम महत्व देना तर आपन संगठनह भर धेर महत्व देना काम, ओ यदि कौनो मनैया येशू ख्रीष्टकम विश्वास करल रलसे फे आपन मण्डलीक सदस्य नैहो कलसे, ओहीह हेल्हा कर्ना काम फे एकदम खराब हो। येशू कल, “होशियार रहो, आनक धनसम्पत्तिक ल्वाभलालच जिन करो, काजेकलसे धेर धनसम्पत्तिले मनैन्हक जीवन बँचाए नैस्याकट्।” एकठो धनी तर मूर्ख मनैयक घटना असिन बा: एकठो धनी मनैया रह। वाकर जग्गम अनाजपानी एकदम धेर फर्लस्। त दोस्त्र उ मनैया मनमन कहलागल, “म्वारठे यी अनाजपानी ढर्ना ठाउँ नैहो, आब मै का करूँ?” तबदोस्त्र उ असिक कहल, “आब असिक करपरल, मै आपन सब भखारी बिग्राक ओहीसे बराबरा भखारी बनैम ओ आपन सब अनाजपानी उहँ ढरम ओ मै आपन प्राणह कहम, ‘रै प्राण, धेर वर्षसम खाइपुग्ना सस्ता सम्पत्ति त्वार लाग कुह्याइल बा। मजासे सुखचैनम बैसा खा, पि ओ मौज कर’।” तर परमेश्वर ओहीह कल, “रै मूर्ख, आजुक रात तँ प्राण छोब्या, जत्रा श्रीसम्पत्ति तँ कुह्यारख्ल्या, उ के खाई?” आपन लाग केल धनसम्पत्ति कुहेइना, तर परमेश्वरक नजरम धनी नैरना मनैन्हक दशा अस्तै रठन। परमेश्वरक वचनम लिखल बा, “काकरकि संसारभरीक धनसम्पत्ति हाँठ पार्क फे मनै स्वर्ग जैना मौका गुमैल कलसे, हुँकन का फाइदा?” “उहओसे मै टुँहन कहटुँ आपन प्राण बँचाइक लाग का खैबी, ओ आपन आड ट्वापक लाग का लगैबी कैक फिक्रि जिन करो, काकरकि जहाँ दुन्हक धन बा, उहँ दुन्हक मन फे रठा।” तर “पैल्ह परमेश्वरह आपन जीवनम राज्य करदेओ ओ उहाँक कहल बमोजिम ठीक जीवन जीओ, त तुह अवश्यक पर्ना चिज पैबो।”

८. शैतान:- सब झुठ बात शैतान सृजैठा, काजेकलसे शैतान झुठ बातक बाबा हो। शैतान मनैन उल्काक झुठ बवाल ओ धेर किसिमक पाप कर लगैठा, काकरकि उ मनैन्हक मनम राज्य जमैलरठा। येशू कल, “तुह त शैतानक पक्षम लगुइयन हुइटो, उहओसे तुह वाकर चाहना पूरा कर्ठा। शैतान त शुरूसे हत्यारा रह काजेकलसे सत्य बातह उ हेल्हा कर्ठा। वाकरम सत्यता नैरटस। जब उ झुठ बोल्ठा, तब उ आपनओसे बोल्ठा काजेकलसे झुठ कलक झुठ हो। शैतानक कब्जम रहल मनै खराब बोली बोल्ठ ओ खराब काम कर्ठा। कपटी मनै असिन रठ कि हुँक आपन बट्वाइल झुठ बातह ओ आपन करल झुठ कामह थाहँ नैपाइलअस बहाना बनैठा। परमेश्वर खराब काम कर या खराब बात बट्वाइ नैसेकट्। ओसहँक ख्रीष्टकम विश्वास करुइयन खराम काम कर ओ खराब बात बट्वाइ नैपरट। बाइबलम असिक लिखल बा, “यदि हम्र परमेश्वरसे हमार मजा सम्बन्ध बा कैक कठी ओ हम्र खराब काम कर्तीरठी कलसे, हम्र सत्य बात नैबोल्टी ओ परमेश्वरक देखाइल सत्य बातह इन्कार कर्ठी कना बात हमार व्यवहार देखैठा।” “परमेश्वरक राज्यम जाइ नैपउइयन असिन काम कर्ठ: काला देखैना, व्यभिचार कर्ना, झुठ बोल्ना, ओ झुठ बातह मजा मन्ना।”

९. टोरेयाँ:- चित्रम रहल टोरेयाँ मनैन्हक अक्किलह संकेत कर्ठा। यिहाँ उ टोरेयाँ कन्या, अपवित्र ओ दुष्ट जसिन देखपठा। सायद एकदम पाप कर्तीरलकओसे वाकर चम्कना गुणह अन्धार छोपरखलस्। वाकर अक्किल जाट्से हेरागैलकओसे उ मनैया ठीक बेठीक छुट्याइ नैसेकना होरहल। यी भ्रष्ट अक्किल कबुकाल शान्त रठा ओ कबुकाल जुन दुखित होरठा। यी अक्किल भ्रष्ट हुइलकओसे क्षमा देहपर्ना ठाउँम दण्ड देठा ओ दण्ड देहपर्ना ठाउँम क्षमा देदेठा। विश्वासमसे पाछ हटल मनैयक अक्किल सेन्द्रार

लुहाकिले दागगैलुअस रठस। वाकर चेतना, सुद्धिबुद्धि जाटसे हेराइल रठस, काजेकलसे उ मनैया शैतानक बात सुन्क एकदम कपटी हिसाबले झुठ बोलराखल।

१०. आँख:- मनै जहाँ नुक्क काम कर्लसे फे, कैयाँकुचिल अन्धारम रलसे फे परमेश्वर देख्ठीरठ। मनैन्हक मनम रहल सब बात परमेश्वर देखडठ। उहाँक नजरमसे कुल्लु फे नुकाइछिपाइ नैसेकजाइट। उहाँ मनैन्हक मनम नुक्क सब विचार ओ भावना जन्ठ ओ देखठ।

११. आगिक छिटिछिट्टी जीभ:- मनक (हृदयक) आन्जरपान्जर रहल आगिक छिटिछिट्टी जीभ पापी शरीरह परमेश्वरक प्रेमले घेरलबा कना बातक संकेत कर्ठा। परमेश्वर पाप कामह हेल्हा कठ तर पापी मनैयह प्रेम कठ। उ मनैया नाश नैहवाए तर आपन पापी मन घुमाक परमेश्वरकठे आए ओ लौव जीवन पाए कना उहाँक इच्छा बाटन। वास्तवम येशू ख्रीष्ट पापी मनैन बँचाए अइलह। एकठो पापी मनैया आपन मन घुमाक परमेश्वरकठे आइल कलसे, स्वर्गम रहइयन धेर आनन्द मनैठ आगिक यी छिटिछिट्टी जीभ येशू ख्रीष्टक रगतक फे संकेत कर्ठा। उहाँ सारा संसारक पाप उठाक लैजैना परमेश्वरक पठाइल बलिदान हुइटा।”

१२. स्वर्गदूत:- स्वर्गदूतहुँक परमेश्वरक राज्यक सन्देश मनैन पुगैठ। मनै छली, कपटी ओ पापले भरल रलसे फे परमेश्वर मनैनसे बवाल चहूठ। मनै आपन-आपन पापी मन घुमाक परमेश्वरकठे अइहीं ओ उहाँक प्रेम आपन जीवनम अनुभव करहीं कना उहाँक धेर चाहना बाटन।

१३. डुकुर:- डुकुर परमेश्वरक आत्मक संकेत कर्ठा, जौन आत्मा मनैन्हक पापक दोष देखादेठ ओ परमेश्वरक सत्यता ओ न्यायह पापसे अल्लैठ। यी चित्रम परमेश्वरक आत्मा मनैयक मनमसे (हृदयमसे) बाहार बाट। पापक शासन रहल ठाउँम उहाँ रह सेक्बो-सेक्बो नैकर्टा।

यदि चित्रम देखाइल बात ओ अप्णक मनक अवस्था मिल्ला कलसे, अप्ण परमेश्वरसे पुकारा करी। प्रभुक अजरारह आपन मनम चम्क दि। “प्रभु, येशू ख्रीष्टक विश्वास करी, त अप्ण जीवन पैबी।” परमेश्वर त तयार बाट। उहाँ अप्णक मन परिवर्तन कर्ना बाचा कैरखल ओ उहाँ अप्णह लौव आत्मा भरल लौव मन देहुइयाबाट। यी बात द्वासर चित्रम बयान कैगैल् बा।

द्वासर चित्र

यी चित्र आपन पापी मन घुमाक परमेश्वरह ख्वाज शुरु करल एकठो मनैयक मनह संकेत कर्ठा। यिहाँ परमेश्वरक खबर पुगुइया एकठो तरवालक रुपम परमेश्वरक वचन पकर्लबाट। “काकरकि परमेश्वरक वचनम जीवन देना शक्ति बा, ओ दुनुओर धार रहल तरवालसे फे धन्यार बा। यी भित्तरसे प्राण ओ आत्मह अलग कैदेठा। यी जोर्नी ओ हड्डीक मासीह अलग अलग कैदेठा। ओ परमेश्वरक वचन मनैन्हक मनक भावना ओ विचारह जाँच सेकठा।” “पापक ज्याला मृत्यु हो” ओ “जर्मलसे मनै मुवपठा ओ न्यायक लाग ठह्याइपठा” कना बात परमेश्वरक वचनम लिखल बा। परमेश्वरक विश्वास नैकर्ना सब पापी मनै आगी ओ गन्धकम फँक्वापैहीं।

परमेश्वरक खबर पुगुइयक और हाँठम एकठो खोप्रही बाटन। उ खोप्रही जर्मल मनै मुवहीपठा कना बात देखैठा। हम्र आपन शरीरह धेर प्रेम कर्ठी, हम्र लुगा लगैठी, खैठी, पिठी, लहैठी। जे होस् हम्र

शरीरक धेर रेखदेख कठीं ओ शरीरक चाहना परिपूर्ति फे हुइठा, तर एक दिन यी शरीर मुजैठा, हमार आत्मा केल नैमुवट्। एक दिन सब मनै परमेश्वरक न्यायक आघ जाइपठा।

यी चित्रम एकठो पापी मनैया परमेश्वरक वचनम ध्यान देह शुरु कैराखल् ओ परमेश्वरक प्रेमक लाग आपन मन खोलराखल। परमेश्वरक आत्मा वाकर कन्या ओ पापी मनम चम्कभिररल। वाकर मनक अन्धार मन्दिरम परमेश्वरक अजरार जाइभिररलन। परमेश्वरक अजरार मनक भित्तर पैँठल कलसे भित्तर रहल सारा अन्धार निकरजैठा। याकर मतलब धेर जनावरन्हक संकेत कैगैल् पाप निक्रठा। उहओसे, संसारक ज्योति येशूह आपन मनम आइदि, त चित्रम देखागैल्अस अप्णक मनम रहल सब पाप काम ओ पाप विचार अप्णक मनमसे निकरजाई। येशू कल, “मै संसारक ज्योति हुइट्टुँ, म्वार पाछ लगुइया पापक अधीनम नैरही तर जीवनक ज्योति पाई।”

अप्ण आप्णन प्रयासम आप्णन बुद्धिले आपन मनम रहल अन्धकार कबु फे निक्राइ सेकुइया नैहुइटी। उ अन्धाकार निक्रैना सबसे सरल, सजिलो, पक्का ओ प्रभावशाली तरीका यहि हो कि अप्ण येशू अर्थात् जीवनक ज्योतिह आपन मनम आइ देहपठा, तब अन्धकाररूपी पाप अपन्हे बाहार निकरजैठा। हमन रातक जोन्हूया ओ टोरैयँक अजरार डानडान पाइसेकठी तर जब दिन उठ्ठा, तब केल सारा अन्धकार हेरैठा। येशू त दिनअसक सत्य बातक अजरार देहुइया परमेश्वर हुइटा। जब उहाँ यरूशलेमक मन्दिरम गैल, तब उहाँ ब्याँचक लाग लैगैल् पशन खेददेल ओ पैँसा सटुइयन्हक टेबुल बिल्टादेल ओ हुँकन कल, “परमेश्वरक वचनम असिक लिखल बा: म्वार घर प्रार्थना कर्ना घर हुई तर दुह त यहीह डाँकन्हक अड्डा बनारख्लो।” अप्णक मन त परमेश्वरक घर ओ उहाँक मन्दिर हुइक लाग बनागैल् हो, जहाँम परमेश्वर बास करचहठ, यहीह सफासुग्घर करचहठ, ओ अजरार, शान्ति ओ प्रेमले भरचहठ। येशू हमार पाप क्षमा करक लाग केल अइलक नैहुइट, तर हमन बँचाए ओ पापक बन्धनमसे छुटकारा देहक लाग अइलह। “उहओसे परमेश्वरक छावा टुँहन छुटकारा देहीं कलसे, दुह स्वतन्त्र हुइयाबाटो।”

तीसर चित्र

यी चित्र आपन पापी मन घुमाक परमेश्वरकठे आइल एकठो मनैयक मनक अवस्थह देखैठा। आब उ मनैया आपन पापक भन्वा कत्रा गम्हीर ओ डरलगिटिक रठा कना बात देख्नाहा होरहल। येशू क्रूसम मुक उह गम्हीर ओ डरलगिटिक पापक भन्वा हमार सटाहा बोकदेल। उ मनैया येशूक क्रूसम आपन नजर लगाइल त, उ मनैया स्वर्गदूत ओ परमेश्वरक वचन द्याखल। उह क्रूसह देख्लक कारण उ आपन पापी मन घुमाक परमेश्वरकठे आइल ओ वाकर मन एकदम दुखित हुइलस। उ येशू ख्रीष्टकम परमेश्वरक प्रेम द्याखल त, वाकर मन परमेश्वरकठे घुम्लस। उ मनैया परमेश्वरक छावा येशू ख्रीष्ट वाकर धेर पापक गम्हीर भन्वा ब्वाकक् लाग यी संसारम अइल ओ वाकर सटाहा सराप परल क्रूसम मुल कना बात बुझलागरहल।

सत्य बात का हो कलसे, येशू ख्रीष्टह कोर्न लगैल, काँटक टोपी बनाक घलादेल, हाँठ ओ ग्वारम किल्ला ठोकदेल ओ उहाँ हमार पाप ब्वाकक् लाग क्रूसम मुल। यी चित्र आपन पापी मन घुमाक परमेश्वरकठे आइल मनैयक मन ओ जीवनम धेर परिवर्तन अइना बात देखैठा। परमेश्वरक वचन सुन या पढ़ लागल कलसे, उ मनैया ऐनम अपन्हेह द्याखलअस द्याखभिठा, ओ अप्ण परमेश्वरसे धेर दूर हुइल् ओ उहाँक आज्ञा अनुसार नैचल्ला व्यक्ति रलक महसुस कठा। जब उ मनैया आपन पापी मन घुमाक परमेश्वरकठे अइठा ओ दुखित हुइटी ओ आँश खसैटी परमेश्वरक आघ आपन जीवन सुम्पठा, तब येशू ओहीह आपनठे तन्ठा। परमेश्वरक प्रेम ओ शान्ति वाकर मनम आइल समयम उ मनैया “परमेश्वरक

छावा येशू ख्रीष्टक रगत हमन सब पापमसे च्वाखा बनैठा” कना बात महसुस करभिठा। “परमेश्वर मन टुटल मनैन्हक पन्ज रठा” परमेश्वर आपन वचनम असिक कैरखल, “मन टुटल ओ म्वार वचन सुन्क डरुइयन मै हेटीरठु।” येशू कठ, “हेरो लको, आनन्द मनाओ, काकरकि टुन्हक पाप क्षमा होरहला” चित्रमक मनैया यी सब काम म्वार लाग कैगैल् हो कना बात विश्वास कैक क्रूसम बहागैल् येशूक रगतह जब ह्यारभिठा, तब उ आपन पापक सब भन्वा हट्स्याकल ओ हलुक जीवन हुइल महसुस करभिठा, काकरकि येशू हमार दुख ओ पीर सहल ओ हमार पापक कारण घाइत्या बनागैल ओ हमार अधर्मक कारण अपमानित हुइल, ओ “परमेश्वर हमार सबजन्हक अधर्मक भन्वा उहाँह बोकादेला।”

उ मनैयक अन्धार मनम परमेश्वरक आत्मक अजरार जाइटना। आब उ पापी नैहो, येशूक रगतले वाकर पाप धोगैल्बाटसा। वाकर पाप क्षमा होगैलस कना बात परमेश्वरक आत्मा वाकर आत्मह कठ ओ उ परमेश्वरक कृपाले उहाँक सन्तान हुइना हक पाराखल। आब उ मनैया “येशूक विश्वास करुइयन कुई फे नाश नैहुइत तर स्वर्गम परमेश्वरकसँग सड्भर रहपैना जीवन पैठ” कना बात पक्कासे जन्लबा। काकरकि “हम्र येशूक रगतले उद्धार पैठी अर्थात् उहाँक कृपाले पापीन्हक पाप क्षमा हुइठा।” आब उ मनैयक पापी स्वभावक सटाहा परमेश्वरक लाग जीवन जीना ओ उहाँक सेवा कर्ना इच्छा जागलबाटसा। उ मनैया पापसे खेल्ला चिजह प्रेम कर छोराराखल, बेनसे परमेश्वरह प्रेम कर लागरहल।

चौथा चित्र “”

यी चित्र हमार प्रभु ओ उद्धारकर्ता येशूक बलिदानले पूरा छुटकारा ओ शान्ति पास्याकल एकठो ख्रीष्टीयन मनैयह संकेत कठी। उहओसे आब वाकरम कुछ घमन्ड नैहुइतस। “हम्र येशूकसँग पाप कामक लाग मुजाई ओ परमेश्वरक नजरम ठीक जीवन जीए सेकी कैक हमार प्रभु येशू क्रूसम मुला।” येशू ख्रीष्टक क्रूसक कारण मै संसारक लाग ओ संसार जुन म्वार लाग क्रूसम टंगागैल् बा। यी चित्रमक मनैया पाप कामओर लैजैना आपन इच्छह क्रूसम टंगाराखल। हम्र परमेश्वरक आत्मक अगुवाईम चलना ओ पाप स्वभावक काम कर्बो-कर्बो नैकर्ना आज्ञा पारखली।

यी चित्रम एकठो ठम्का बा। उ ठम्कम प्रभु येशूह नड्ट बनाक मनै बाहान्खलह। यिहाँ येशूह करसे मर्लक लट्ठी ओ कोर्ना फे बा। उहाँ हमार पापक लाग मुवावापैलह, काकरकि “हमार शान्तिक लाग उहाँ दुख सहला।” हेरोद राजा ओ हुँकाहार मनै फे येशूह अपमान कर्ल, कोर्ना लगैल, बैजङ्ग्यार झुल्वा घलादेल ओ काँटक मुकुट बनाक “रज्वक पहिरना मुकुट यिह हो” कटी घलादेल। “रज्वक हाँठम राजदन्ड रहपठी” कटी हुँक उहाँक हाँठम लट्ठी देल, ओ “यहूदीन्हक रज्वा” कैक सलाम कर्लक बहाना बनैल। हुँक उहाँह थुक्ल, उहाँक हाँठमसे लट्ठी अछिन्क उहाँक कपारीम ठोक्ल। असिक हुँक उहाँक धेर अपमान कैक पाछ उहाँह क्रूसम टङ्गाइक लाग शहरसे बाहार लैगैल।

आजकाल नाउँक केल्हिक धेर ख्रीष्टीयन बाट, जे चर्चम जाक प्रार्थना कठ, प्रभु भोजम भाग लेठ, परमेश्वरक भजन गैठ, ओ दुष्ट काम कैक आपन उद्धारकर्ता प्रभुह क्रूसम टङ्गैटीरठा। येशू कल, “महीह प्रभु, प्रभु कैक कहुइयन सब जन परमेश्वरक राज्यम जाइपउइया नैहुइत, तर परमेश्वर बाबक इच्छाअनुसार जीवन जीउइयन केल जाइपैहीं।”

यी चित्रम पैँसक थैली फे बा। उ थैली यहूदा इस्करीयोतक हुइतस, जे चाँदीक तीसठो पैँसम येशूह ध्वाखा देहल। उ पैँसह धेर प्रेम कर्लक कारण वाकर मन अन्धार होगैलस। वाकरसँग लाल्टीन, सिक्री लेल्ह-लेल्ह सिपाही फे रलह। हुँकहे येशूह रातक पकलह ओ उहाँक झुल्क लाग गोटी डर्लह। असिक परमेश्वरक वचनम लिखल बात पूरा हुइल्, “हुँक म्वार लुगा बँटहीं ओ एकठो झुल्क लाग जुन

गोटी डरहीं।” हुँक येशूक सब चिज लेल तर उहाँह “यी मनैया हमारम शासन करल हम्र नैचहटी” कटी इन्कार कर्ल।

मनै परमेश्वरसे सब किसिमक आशिष पाइ चहठा। जस्त: बयाल, पानी, घाम आदि। तर हुँक अपन्हे जुन परमेश्वरक अधीनम रह नैचहटा। धेर मनै निराश हुइलम या आपतविपत परलम केल परमेश्वरसे सहायता खोज्ठा।

“सिपाहीहुँक येशूक क्वाखम भालले गोभ्ल, त उहाँकमसे रगत ओ पानी अइलना।”

मुर्घा बस्नासे आघ पत्रुस तीनचो येशूह इन्कार कर्ल तर पाछ आपन छाती पिट-पिट रुइल। का अप्न येशूह आपन वचन ओ कामले अस्वीकार कैरखली? कि मनैन्हक आघ अप्नह लाज लगठा? येशू कल, “उहओसे जे मनैन्हक आघ महीह स्वीकार करी, मै फे स्वर्गम परमेश्वर बाबक आघ ओहीह स्वीकार करमा। तर जे मनैन्हक आघ महीह इन्कार करी, मै फे स्वर्गम परमेश्वर बाबक आघ ओहीह इन्कार करमा।” येशू यी फे कल, “मुव पर्लसे फे इच्छुक हुइना मनैया म्वार चेला हुइसेकी।” येशू ख्रीष्टह विश्वास कर्लरना मनै धन्यक हुइटा।

पाँचवाँ चित्र

यी चित्र परमेश्वरक प्रशस्त दया पाक पाप धोगैल् एकठो पापी मनैयक मनह संकेत कर्ठा। आब यी मन परमेश्वरक मन्दिर होरहल, जहाँ परमेश्वर बाबा, परमेश्वर छावा ओ परमेश्वरक आत्मा बास कर्ठा। प्रभु येशू ख्रीष्ट बाचा कैरखलह, “महीह प्रेम करुइया म्वार वचन पालन करी ओ परमेश्वर बाबा ओहीह प्रेम करुइयाबाट ओ हम्र वाकर जीवनम अइबी ओ बास कर्बी।” परमेश्वर मनैन आदर कर्ती आशिष देक उठैठा।

आब यी मनमसे पाप निकरक गैरहल। झुठ ब्वाल लगुइया शैतानक बैठल यी मनम आब परमेश्वरक आत्मा बास करल हम्र देख्ठी। पापले करबेर घिनलगिटिक रहल ठाउँ आब वाकर मन आशिष पाइल एकदम मजा-मजा फारा फर्ना रुखा या फुलन्या होरलस। यी फुलरेम आब परमेश्वरक आत्मक फारा फर्ठा। जस्त: प्रेम, आनन्द, शान्ति, धीरज, दया, भलाई, विश्वस्तता, नम्रता, संयम ओ परमेश्वर ओ मनैन मन पर्ना अस्तै आकुर गुण। आब उ मनैया फारा फर्ना अङ्गुरिक हङ्ग्याअस होरहल। अङ्गुरिक ब्वाँट जुन येशू ख्रीष्ट हुइटा। असिन फारा फर्ना कलक अचम्मक बात हो। उ मनैया येशू ख्रीष्टकम रठा ओ येशू ओ उहाक वचन जुन वाकरम रठस। परमेश्वरक आत्मक शक्ति ओ बप्तिस्मा पैलक कारण वाकरम आब पाप कामम विजय हुइना ओ पापी स्वभावह क्रूसम टङ्गाक मुवैना शक्ति बाटस। उ परमेश्वरक आत्मक सहायताले आत्मिक हिसाबले जीवन जीना ओ पापी स्वभावह मुवैना शक्ति पाराखल। आब उ येशूकम विश्वास कैक आत्मिक जीवन जीना मनैया होरहल, काकरकि उहाँकम विश्वास कर्लसे मनै पापी जीवन नैजीटा।

येशू कल, “पवित्र मन रना मनै धन्यक हुइटा, काकरकि हुँक परमेश्वरह देखुइयाबाटा।” दाउद राजा फे आपन सारा धनसम्पत्ति ओ आपन सब शत्रुन हरैल, तर फे उ का थाहाँ पैल कलसे, सबसे बरा झग्रा त हुँकाहार आपन मनम रलहन। आपन मनम कुछ् चिज चाहल बा कैक उ महसुस कर्ल ओ असिक परमेश्वरसे पुकारा कर्ल, “हे परमेश्वर, म्वारम पवित्र मन सृजादी, महीह लौव आत्मा दी।” आपन मन अपन्हे च्वाखा बनाए ओ आपनम लौव आत्मा सृजाए कुइ फे नैस्याकट। यी त दाउदक करलअस आपन पापी मन घुमाक परमेश्वरक आघ जैलसे केल हुइना काम हो। परमेश्वर अप्नह लौव जीवन देना इच्छा कर्लबाट। झुठा धर्मले पिउँडा लगाइल ओ घमण्डले फुलल् अप्नक मनम परमेश्वर बास कर नैसेकट। अप्नह परमेश्वर केल सहायता करसेकठ, काकरकि उहाँ का बाचा कैरखल कलसे, “मै टुन्हकम च्वाखा

पानी छिटम त टुह पवित्र हुइबो। असिक मै टुहन सब चिजिमसे पवित्र बनैमा दोस्र मै टुन्हकमसे पत्थक मन निक्काक मासक मन डारदेहम। मै आपन आत्मा टुन्हकम डारदेहम त टुह म्वार देहल नियमअनुसार जीवन जीबो।” यी लौव नियम परमेश्वर आपन छावा येशू ख्रीष्टक रगतले छाप लगाक पक्का कैरखल।

यी चित्रम स्वर्गदूत फे बाटा। स्वर्गदूत आत्मिक हिसाबले मुक्ति पाइल मनैन सेवा करक लाग परमेश्वरसे खटागैल आत्मा हुइटा। हुँकर परमेश्वरक डर डरैना मनैन्हक सेवा कर्तीरठा।

यी चित्रम शैतान फे मनक लगघ ठह्याइल बा। उ अपन पैल्ह बैठल मनैयक मनम जाइक लाग मौका खोज्तीबा। उहओसे जागा होक प्रार्थना कर्तीरहक लाग हमन एकठो आज्ञा देगैल बा। “काकरकि टुन्हक विरोधी शैतान त केहीह भेटाउँ ओ लिलडारुँ कैक गुन्जना बघ्वाअस खोज्ती नेइटा।” शैतान कयौचो स्वर्गक चम्कना मनैयक रुपम आपन भेष बदल्क जागा होक प्रार्थना नैकर्ना ख्रीष्टीयनहुँकन झुकाक ल्वाभलालचम फँसैठा। यिहाँसम कि उ त बरा-बरा पाष्टरहुँकन फे गिरैना कोसिस कर्ठा। तर यदि हम्न शैतान विरोध कर्ना हो कलसे उ हमन छोर्क चल्जैठा।

छठवाँ चित्र “”

यी विश्वासम पाछ हटभिरल एकठो मनैयक मनक चित्र हो। वाकर एकठो आँख टुम लागरलस, जौन आँख उ आब ख्रीष्टीयन जीवनम जुर हुइटी जाइटा कना बात देखैठा। वाकर और आँख जुन संसारक मानइज्जत, मैयाप्रेम ओ धनसम्पत्तिक ल्वाभलालचम फँसल बात देखैठा। वाकर मन अन्धार हुइ लागरलस ओ आब उ परमेश्वरक वचन हिसाबले जीवन जीना बातम सहमत नैहो। वाकर आन्जरपान्जर ओहीह लौभैना ओ पापम फँसैना धेर चिज बाटस। उ ओसिन चिजिक विरोध कर्ना त कहाँ हो कहाँ इन उल्ट आपन मन उह चिजम लगैटीजाइटा। वाकर मन शैतानकओर जाइटस। परमेश्वरक वचन सुन छोर्क उ आब शैतानक बातम ध्यान दिह लागरहल। हुइना त उ आम्हीसम फे मण्डलीम जैटीरठा ओ संसारक चिजम मन लगैलक बात नुकाइक लाग धर्मक खवाल फे ओहर्ल बा।

वाकर मनम परमेश्वरह प्रेम कर्ना विचार जुर होरलस। आब उ दुइ मनक मनैया होरहल। उ संसारक रमझम जीवन जीठा तर फे चर्च जाक परमेश्वरह प्रेम कर्लक बहाना बनैठा। वाकर मनह अजरार बनैना टोरैया अन्धार होरलस। उ येशू ख्रीष्टक चेला हुइछोरराखल ओ वाकर जीवन गम्हीर भन्वा केल होरलस। वाकर विश्वास डगमगाइभिरलस, आब उ परमेश्वरसे संगती कर ओ पुकारा कर फे छोरराखल। उ लापरबाही जीवन जीटी आपन मनम सुस्त-सुस्त शैतानह ठाउँ देहलागरहल। उ चर्चक सँगतीमसे फे संसारक संगतीम धेर आनन्दित हुइलागरहल।

यिहाँ मन्जरोक चित्र मनैयक घमन्डह संकेत कर्ठा। उ फे मनैयक मनम पैँठ ख्वाजटा। उ मनैया परमेश्वरक कृपाले केल मुक्ति पारखनु कना बात बिस्राक एकठो घमन्डी ख्रीष्टीयन हुइलागरहल। वाकर मनम पाप विचार फेदोस्र आइभिरलस। उ घरी-घरी घिनलगिटक खेल्वार कर्ना, अनैतिक चित्र हेर्ना, खराब मनैन्हक संगत कर्ना, लाजलगिटक नाचकोरम आनन्द मनैना जसिन शैतानक खराब काम करलागरहल। उ आजकाल असिन विचार कर्ठा, “अत्रा कर्ना त स्वभाविक हो, यी पाप काम नैहो।”

यी बात सत्य हो: जसहँक हम्न हमार मनम अइना खराब विचारह च्वाक नैसेकटी, ओसहँक शैतानअसक चिरैँह हम्न हमार कपारीक उँप्र-उँप्र उरबेर च्वाक नैसेकटी। तर यदि हम्न ओसिन दुष्ट चिरैँह हम्न मनम ठाँट लगाइदेली ओ दुष्ट कामक छौना सिर्जाई देली कलसे, उहींम हम्न फे दोषी ठहरुइयाबाटी। यदि हम्न शैतानह कन्या अङ्गी केल छुवक लाग देली कलसे, उ हमार सलहाँठ पकर्क हमन नरकम घँसेइटी लैजउइया बा। उहओसे हमार लाग परमेश्वरक चेतावनी का बा कलसे हम्न ज्वान

अवस्थक शरीरक कामसे दूरऽ रही, ओ यी हमन जत्रा लोभैलसे फे हम्न वाकर ल्वाभम नैफँसी। हम्न येशूकठे जाई, हमन बँचुइया उहँ हुइटा।

चित्रमक मनैयक मनम छुरी ग्वाभल बाटस। याकर मतलब का हो कलसे उ मनैया ख्रीष्टीयन विश्वासक विरोध कर्ना होरहल कना बातक संकेत हो। उ मनैया दुइ मनक हुइलकओसे आब उ विजयी जीवन जीए नैस्याकठो। उ परमेश्वरसे फे मनैन्हक डर मान लागरहल। मनै महीह का कहीं, का करहीं कना चिन्तम उ परल बा ओ परमेश्वरसे दिन दिन दूर हुइटी जाइटा। आपतविपत परिआइल ब्याला वाकर जीवनम रिस पैँठ खोज्ठस। चित्रम देखपर्ना और जनावर विजयी हुइल कलसे डाह कर्ना पाप निक्रठा ओ भित्तर जाइखोज्ठा। यदि अपन ओहीह डान्चे केल मौका देली कलसे फे उ अपनक जीवनम औरजहन हेल्हा कर्ना ओ घमन्ड कर्ना बातक ड्वार खोलदेठा।

यदि हम्न येशू प्रभुक चेतावनीम ध्यान नैदेना हो कलसे, रुप्यापैँसक ल्वाभ देखाक ओसिन पाप सजिलोसे मनम छिजैँठा। येशू कल, “जागा होक प्रार्थना कटीरहो त पापम नैपबो।” उहओसे “मै अरगर बाटुँ कैक विचार करुइया मनैया होसियार रहपर्ठा, नकि त ढल्ला बेर नैरहट्टा।” हम्न परमेश्वरक सब आत्मिक हातहतियार भिरपर्ठा। उह हातहतियारले केल हम्न शैतानक विरोधम उठ सेकठी।

सातवाँ चित्र “”

यी चित्र विश्वासम पाछ हटस्याकल मनैयक मनक अवस्थह जनैठा। यी मनैया पैल्ह येशू ख्रीष्टकम विश्वास कैरख्लाहा ओ आत्मिक आशिषक स्वाद चिखल मनैया हो। परमेश्वरक आत्मक संगतीम आनन्द मनाइल मनैया हो। आब उ मनैया परमेश्वरक संगतीम नैजाइटा। यी चित्र परमेश्वरकम कबु फे विश्वास नैकरल, कबु फे आपन पापी मन घुमाक परमेश्वरकठे नैआइल, खुशिक खबर सुन्क फे मतलब नैकरल, परमेश्वरक सल्लाहहन जिद्दी कैक नैमानल, मजा कामओर लैजाइक लाग जत्रा कोसिस कर्लसे फे झन-झन खराबओर आपन मन लगैना मनैयह फे जनैठा।

एकचो येशूकम विश्वास कैक फे उहाँह छ्वारल मनैन्हक बारेम उहाँ असिक कठ, “जब भूत्वा लागल मनैयकमसे भूत्वा निकर्क जैँठा, तब उ बैठक लाग मजा ठाउँ खोज्ठी नेङ्गठा, ओ उ कहाँ नैभँटाइल कलसे, आब पैल्हकके बैठल ठाउँम घुम्क जाइपरल कठा। घुम्क आइल कलसे बाहारबुहुरक सफा बनाइल देख्ठा। दोस्र उ और कर्ना-कर्ना धेर भूतन लेक अइठा ओ हुँक सब जन उहाँ बैठ्ठा। असिक उ मनैयक दशा पैल्हकसे झन खराब हुइठसा।” अस्तै मनैन्हक लाग यी उखान कठ, “कुक्कुर ओक्लाक अपन्हे खैठ ओ लाहाखोर कैदेहल सुवर हिलहम जाक लोट्ठा।”

बाइबलम लिखल यी बात येशू ख्रीष्टह विश्वास कर छ्वारल या आपन पापी मन घुमाक परमेश्वरकठे कबु फे नैआइल मनैयक मनक अवस्थसे ट्याक्क मिल्ठा। पाप त जसिक हुइलसे फे मनैयक मनम बैठक लाग ओ शासन करक लाग अइलक हो। वाकर मन कसिन बाटस कना बात त वाकर मुह हेर्लसे फे थाहाँ हुइठा। ढुकुरक रुपम चिन्हजैना परमेश्वरक आत्मा वाकर मनह छोर्ना कर लगलन काकरकि पाप रहल ठाउँम परमेश्वरक आत्मा रह सेक्बो-सेक्बो नैकर्ट। मनैयक मन कि त परमेश्वरक बैठना मन्दिर हो, कि त शैतानक बैठना ओडार हो। यी चित्रम परमेश्वरक खबर पुगुइया बरा दुखी होक उ ठाउँमसे जाइट, तर फे उ मनैया आपन पापी मन घुमाक परमेश्वरकठे आजैँठा कि कैक उ स्वर्गदूत आशा कर्लबाटा। बाइबलम छोट्की छावा असिक करल, “मै उठ्क आपन बाबकठे जैम ओ उहाँह कहम, ‘बाबा, मै अपनक विरोधम ओ परमेश्वरक विरोधम पाप कैरख्नु, आबठेसे मै अपनक छावा

कैजिनालायक फे नैहुइट्टै। आब महीह अप्णक जेलदारी मनैन्हकअस एकठो बनाई।” वाकर बाबा आपन छावा पापी मन घुमैलकओसे आपन छावह क्षमा कैदेल।

यी चित्र हेर्लसे का थाहाँ हुइठा कलसे उ मनैया आपन पापी मन घुमाक परमेश्वरकठे अइना लक्षणऽ नैहुइटस। येशूक विश्वास कैक उहाँसे पापक क्षमा मङ्गना बातक साँचाइ वाकर मनम अइबो-अइबो नैकर्टस। वाकर विवेक त सेन्द्रार लुहाकिले डागलअस होरलस। वाकर कान बाटस तर येशूक वचन सुन्बो-सुन्बो नैकर्टस। वाकर आँख बाटस तर नरकक् डरलगिटक दण्डह देखबो-देखबो नैकर्टस। वाकर चेतना जाटसे मुवलअस होरलस। वाकर मनम शैतान रज्वाअस बरा ठाँटसे बैठलबाटस। आम्हीसम फे उ मनैया अप्ण एक असल मनैयाअस जीवन जीलक बहाना बनैटी बा। उ मनैया उप्र-उप्रभर मजा देखपर्ना, तर भित्र-भित्रभर घिनलगिटक गन्धैना सरलगलल् चिजले भरल बा। “उ मनैया बाहारसे त मज देखपर्ना, तर वाकर भित्तर भर मुवल मनैन्हक हारखोर केल भरल बाटस।”

झुठ बवाल लगुइया जो परमेश्वरक आत्मक ठाउँ लेराखल। उ मनैया भूतन्हक संगतम फँसल बा ओ उह भूत वाकर मनह कब्जा कर्लबाटस। हुइना त उ मनैया ओसिन घिनलगिटक गन्धैना सरलगलल् चिजमसे छुटकारा पाइ चहठा, तर उहाँसे उ मनैया अप्णहे उम्क नैस्याकट। “मोशक व्यवस्था अनुसार जीवन नैजीना मनै त दुइ या तीन जन साक्षीन्हक कारणले मुवँट कलसे, आब विचार करी ना, परमेश्वरक छावह ग्वारले डब्ना ओ अप्णह पवित्र पारल येशूक रगतह अपवित्र मन्ना ओ परमेश्वरक आत्मह अपमान कर्ना मनै झन कत्रा धेर दण्ड पैहीं।”

हेरी संघारी, यदि यी चित्र अप्णक मनक अवस्थसे मिल्दोजुल्दो बा कलसे, परमेश्वरक लगघ हाली आई ओ उहाँसे पुकारा करी। “उहाँ जो अप्णह मुक्ति देहसेकटा” यदि अप्ण जाट्टीसे आपन पापी मन घुमाक परमेश्वरकठे अइठी कलसे, उहाँ अप्णक सब पाप क्षमा कैदेना इच्छा कर्लबाट। यदि अप्ण यी काम करक लाग चाहना केल कर्ली कलसे, उहाँ अप्णह अधीन कर्लरना शैतानक सब शक्तिह अप्णक मनमसे निक्राइसेकटा। कोररोग लागल एकठो मनैया येशूकठे आक उहाँह कहल, “अप्ण चहबी कलसे महीह चोखाइ सेकुइयाबाटी।” अप्ण फे ओसहँक करी। तर यदि अप्ण जिद्दी कठी कलसे ओ परमेश्वरक बात छोर्क शैतानक बात सुन्ठी कलसे, अप्णक जीवनम कुछु फे आशा नैहो, अप्ण त मुक्ति पैना बातम ध्यानऽ नैदेहुइटी, काकरकि “पापक ज्याला मृत्यु हो।”

आठवाँ चित्र “”

यी चित्र अल्याड-मल्याड कर्ना ओ येशू ख्रीष्टक विश्वास कर छ्वारल एकठो पापी मनैया आब मुना अवस्थम पुगल बा कना बात देखैठा। वाकर आत्मा मुना डरले ओ वाकर शरीर जुन दुखाइले भरल बाटस। नैचिताइल ब्याला वाकर मुना दिन पुगैलस। पैल्ह पापसे ख्यालबेर पाइल धवाखादारी आनन्द आब सब हेरारलस। पापक दण्ड वाकर आघ आरलस। नरकक् सहनैसेकजैना दुख ओहीह आपन शिकार बनाक पकर्लबाटस। हुइना त उ मनैया परमेश्वरसे पुकारा कर्ना चाहना कैराखल, तर परमेश्वरक प्रेमह लात मर्लकओसे आब परमेश्वरसे वाकर सम्बन्ध जातसे टुटरलस। वाकर पैल्हक संघरेन आब वाकर लगघ पर्ना फे डरैठ ओ हुँक ओहीह कुछु फे सहायता कर नैसेकटा। जीएटघरी कमैलक वाकर धनसम्पत्तिले ना त वाकर आयु बहाइसेकटस, ना त वाकर प्राण बँचाइसेकटस, ना त वाकर आत्मह शान्ति देहसेकटस। वाकर मन परमेश्वरकओर जैबो-जैबो नैकर्टस, काकरकि शैतान ओहीह परमेश्वरकओर मन लगैना मौक नैदेटस।

जीएटसम उ मनैया जौन चिजह प्रेम करल, आज उह चिज अपन्हेह हियाइअस लागटस। यिहाँसम कि आब त परमेश्वर फे ओहीह सहायता कर नैसेकना अवस्थम उ मनैया पुगरहल। वाकर मनम “जीवित परमेश्वरक सामुन्नेम पर्ना त डरलगिटक बात हो” जसिन लगठस। उ कौनो दिन सुविस्ता रहल समयम या मुव-मुव होगैलसे फे परमेश्वरसे आपन हिसाबकिताब मिलाडरम कैक पैल्ह विचार कैरखलहा। तर ओसिन मौका त सब हेरागैलस ओ आब कुछ कर सेकजउइया नैहो कैक उ भक्खर थाहाँ पाइल। हजारौं मनै एकचोट्टे मुजैठ। हुँक मुव-मुव रहलम परमेश्वरह पुकारा कर्ना मौक नैपैट। उहओसे परमेश्वरसे त आबहे सम्बन्ध जोरडारपर्ना जरुरी बा। यी पापी मनैया अप्ण जीएटघरी परमेश्वरक प्रेम ओ दयह मतलबऽ नैकरल, तर आब मुना ब्याला परमेश्वरसे मुक्ति पैना वचन सुन्ना इच्छा कर्लसे फे का लागटा? उ मनैया आपन जीवनक न्याय हुइबेरीक आवाज केल सुन्ठा, “टै त सराप परल मनैया हुइट्या। टोहीह आब शैतान ओ वाकर पाछ लगुइयन्हक लाग बनागैल् नरकक् आगीम जाइपरी।” “काकरकि मनै एकचो मुवपर्ना ओ न्याय हुइबेर परमेश्वरक आघ ठह्याइपर्ना बात तोकगैल् बा।”

नववाँ चित्र “”

यी चित्र एकठो ख्रीष्टीयन जीवनम पापम फँसैना अग्नीपरीक्षा परिअइलसे फे पाप काम नैकर्ना मनैयह देखैठा। ओहीह पापम फँसाइक लाग चारिओसे वाकर जीवनम अग्नीपरीक्षा आइखोज्लसे फे येशू ख्रीष्टकम उ विश्वास कर्लरठा ओ आपन मन खराब कामम नैलगाइट। उ येशू ख्रीष्टकम विश्वास कर्ना केल नाही तर जत्रा आपतविपत परिअइलसे फे विश्वासी जीवन जीए नैछोर्ना मनैया हो। उ दाहिन, बाउँ कहौं नैटैहूर्कट तर आपन विश्वासक प्रभु येशूसे आपन सम्बन्ध बलगर बनैलरठा।

शैतान ओ वाकर पाछ लगुइया सारा दुष्ट आत्मा उ विश्वासी मनैयक मन खराब कामओर तानक लाग चारिओसे घेर्लबाटा। घमन्ड, पैसक ल्वाभ, व्यभिचार कर्ना आत्मा ओ और अस्तै चिज फे यिहाँ देखागैल् बा। यी चित्रम बध्वक ठाउँम घोन्वा बा, हमार जीवनम पाप फे रुप बदल-बदल घरी-घरी आइखोज्ठा। पाप धर्मक ख्वाल ओहूर्क अइलसे फे होसियार ओ जागा रना ख्रीष्टीयन मनै पापह चिन्डैठ, काकरकि परमेश्वरक आत्मा ओ वचन हुँकन सत्य डगरम न्याङ्गक लाग सहायता कर्ठन। चित्रम विभिन्न जनावरन्हक सँगसँग एकठो मनैया डारु भरल गिलास हाँठम लेक नाचटा ओ उ विश्वासी मनैयह संसारक मोजमजाम भुलाक पाप कामम फँसाइक लाग कोसिस करटा। उ जत्रा कोसिस कर्लसे फे येशू ख्रीष्टकम विश्वास कर्लरना उ ख्रीष्टीयन मनैयक जीवनम कुछ असर नैपर्तस, काकरकि उ अपन्हे पाप ओ संसारक लाग मुवल बराबर होरहल। चित्रम रहल और मनैया उ विश्वासीह छुरीले ग्वाभटा। खराब वचन बोल्ना, येशू ख्रीष्टकम विश्वास कर छोरदेना, अपमान कर्ना, बदला लेना, ओ सब जीवन जीना काम येशू ख्रीष्टकम जाट्टीसे विश्वास कर्ना मनैन्हक लाग मुटुम छुरीले ग्वाभल बराबर हो। पाप ओ संसारक लाग मुस्याकलओसे उ मनैन्हक बातम नैहोक परमेश्वरक बातम धेर ध्यान देना होरहल। उ येशूक कहल बात सम्झठा, “म्वारम विश्वास कर्लक कारण और मनैनसे सँटावा पउइयन, बदनाम कन्वा पउइयन, धन्यक हुइटा जब टुह ओसिक करावापैबो, तब खुसी ओ आनन्दित हुइहो, काकरकि स्वर्गम टुन्हक इनाम धेर हुइया बा।”

उ विश्वासीह सक्यासम परमेश्वरक प्रेमसे अलग बनैना कोसिस कर्दिबाटस। तर उ मनैया दुक्क होक खुसिसे कहसेकठा, “येशू ख्रीष्टक प्रेमसे हमन के अलग करसेकठा? का संकष्ट, का शरीरक दुख, का अनिकाल, का नङ्गा अवस्था, का तरवाल?” “असिन-असिन बातम त हमन प्रेम करुइया येशूक शक्तिले हम्र जीतरली।” उ मनैया परमेश्वरक देहल सब आत्मिक हातहतियार भिर्लबा। उहओसे उ आपतविपत

परिआइल ब्याला या पापम फँसैना परीक्षा परिआइल ब्याला परमेश्वरक चाहना अनुसार ठीक हिसाबले जीवन जीएसेकठा। पापम नैफँसना अस्तै मनै स्वर्गम सड्डभर परमेश्वरकसँग रना जीवन पैठा।

तर वाकर विवेक एकदम सफा बाटस ओ वाकर मन जुन विश्वास ओ परमेश्वरक आत्मले भरिपूर्ण बाटस। स्वर्गदूत वाकर उप्पर बाटा उ स्वर्गदूत परमेश्वरक करल बाचा उ मनैयह समझैठ काकरकि उ धीरज कर्लबा। येशू असिक कैरखल, “जे जिती ओहीह स्वर्गम रहल जीवनक रुखक फारा खाइ देजाई” जे जिती ओहीह द्वासर मृत्यु कुछु हानी नैकरहींस। जे जिती ओहीह गुप्तम रहल भोजन देनेबाटु ओ उज्जर पत्थर देनेबाटु, उ पत्थरम जीवनक एकठो लौव नाउँ लिखल रनेबा, जे पत्थर पाउ उ बाहेक और कौनो जन उ नाउँ जनुइया नैहो। जे जिती ओ म्वार आजम अन्तिमसम स्थिर रही ओहीह उज्जर लुगा घलाजाई ओ वाकर नाउँ जीवनक किताबमसे कब्बुनी मेट्जाई ओ ओहीह म्वार हो कैक म्वार बाबा ओ उहाँक सब स्वर्गदूतन्हक आघ स्वीकार कैजाई। जे जिती ओहीह मै परमेश्वरक मन्दिरम खुँटा बनाजाई ओ उ उहाँसे कब्बुनी बाहार निकरने हो। जे जिती ओहीह मै म्वार सिंहासनम म्वारसँग बैठक लाग दिहम, जसिक मैफे जित्तु ओ म्वार बाबकसँग उहाँक सिंहासनम बैठलबाटु।

यी चित्रम पैसक थैली खुल्ल बा। वाकर मतलब का हो कलसे उ मनैया आपन मन केल नैहो क पूरा धनसम्पत्ति समेत परमेश्वरह देराखल। संसारक आपन धनसम्पत्ति फाल्तू चिजम खर्च नैकैक उ मनैया बेनसे गरीब मनैन सहायता कर्ठा, ओ आपनठे रहल चिज परमेश्वरक प्रशंसा हुइना कामम खर्च कर्ठा।

यी चित्रम रोटी ओ मच्छी बा। वाकर मतलब का हो कलसे, उ मनैया अनुशासित ओ पापक दाग नैलागल जीवन बितैती बा कना हो। उ लागू पदार्थ नैपियट, रगत नैखाइट, ट्वाँटा बुज्क मुवाइल पशक शिकार नैखाइट, ओ ओसिन चिज खाक आपन जीवनम पापक दाग लाग नैदेहट्। उ आपन पैसा बर्बाद नैकरट, ओ लागू पदार्थ खाक परमेश्वरक मन्दिररुपि आपन शरीरह फुहर नैबनाइट्, तर स्वास्थ्यम हानी नैहुइना खाना केल खैठा। उ आपन मनह प्रार्थना कर्ना घर बनाराखल। परिस्थिति जसिन रलसे फे उ घरम या मण्डलीम परमेश्वरक आराधना कर जाजैठा। उ अक्कल्हे या समूहम रहक प्रार्थना फे कर्टीरठा, काकरकि एकठो असल ख्रीष्टीयन जीवन जीएक लाग परमेश्वरसे संगती कर्टीरहपर्ठा कना बात वाकर लाग थाहाँ बाटस।

यी चित्रम एकठो किताब बिठ्नाइल बा। वाकर मतलब उ मनैया बाइबल सड्डभर पहरा कहल हो। उ हरेक दिन बाइबल पहरा ओ उहींमसे बुद्धि, जीवन, आत्मिक शक्ति, सुख ओ शान्ति पैठा। बाइबल त वाकर म्वारक लाग एकठो दिया हुइस ओ वाकर विरोधी शैतानह हरैना तरवाल हुइस। बाइबल वाकर जीवनक लाग आत्मिक खाना हुइस, प्यास मेटैना ओ अपन्हेह च्वाखा बनैना आत्मिक पानी हुइस, ओ अपन्हेह हेर्ना आत्मिक ऐना हुइस।

उ मनैया येशू ख्रीष्टक प्रशंसा कर्ना कामक लाग दुख सहपर्लसे फे इच्छुक हुइठा, काकरकि उ कामले स्वर्गम सड्डभर परमेश्वरकसँग रहपैठा। उ येशूकूम विश्वास कैक पापक हिसाबले मुरहल ओ लौव जीवन पाराखल। आब उ कबु फे नाश नैहुइना परमेश्वरक चिजम आपन मन लगैठा। उ परमेश्वरक उपस्थितिम रना हुइलकओसें खोल्होक किनारम लगाइल रुखाअस बा ओ ठिक समयम आत्मिक फारा फरैठा। वाकर मन परमेश्वरक आत्मा ओ परमेश्वरक प्रेमले भरल बाटस। उहओसें ओहीह मुवपरी कना कुछु डर नैहुइस।

दशवाँ चित्र “”

येशू कल, “मुवलमसे मनैन फेदोस्र जीयाक जीवन देहुइया मै हुइदुँ, म्वारम विश्वास करुइया मुगैलसे फे उ फेदोस्र जीजाई ओ म्वारम विश्वास करुइया दोस्र कबु नैमुई।” “जे म्वार बात सुनी ओ महीह पठुइया परमेश्वर बाबकूम विश्वास करी, उ स्वर्गम सड्डभर परमेश्वरकसँग रहपाई, वाकर न्याय नैहुहींस काकरकि उ लौव जीवनम प्रवेश पाराखी।” येशू ख्रीष्टकूम विश्वास करुइयन मुवक डर नैडराइपरटा। “कालक हार होगैलसा। मृत्युक शक्ति हेरागैलसा।” तर परमेश्वरह धन्यवाद बा काकरकि हम्न येशू ख्रीष्टकूम विश्वास कर्लकओसे उहाँ हमन लौव जीवन देठ।

परमेश्वरकसँग संगती कर्ना ओ उहाँक वचन अनुसार जीवन जीना मनैयह मुना कुछ डर नैरटसा। यी संसारम जीना दिन ओरैलसे उ खुसिसे परमेश्वरकठे जैठा। येशू ख्रीष्टक चेला पावल असिक कठ, “मुक येशूकसँग स्वर्गम रना इच्छा त बा, काकरकि यी एकदम असल बात हो।”

उ मनैया येशूक मुहार ह्यार चहठा काकरकि उहाँ वाकर लाग कलबरीक कूसम मुक ओहीह मुक्तिक वरदान देल। परमेश्वरक आत्मा फे ओहीह उहाँक वचन सम्झैठ “टुन्हक मन दुखम जिन रह, टुह परमेश्वरकूम विश्वास कठो ओ म्वारम फे विश्वास करो।” आँखिले नैद्याखल ओ कानले नैसुनल ओ मनैन्हक मनले नैस्वाँचल असल चिज परमेश्वर उहाँह प्रेम करुइयन्हक लाग तयार पारदेरखल। येशू ख्रीष्टकूम विश्वास कैक जीवन जीना मनैन्हक लाग स्वर्गम ठाउँ तयार पारगैल् बा। उ ठाउँक पूरासे पूरा बयान कर्ना पृथ्वीम कौनो भाषा नैहो।

अन्तिम चित्रम उ मनैयक पन्ज्र स्वर्गक खबर पुगुइया बाट ओ येशू ख्रीष्टक रगतले धोगैल् उ मनैयह स्वर्गम लैजाइक लाग अस्या लगलबाट। वाकर प्राण ओ आत्मा नाश हुइना शरीरमसे अल्गाक स्वर्गओर जाइटसा। परमेश्वर वाकर आत्मह प्रेम कर्ल काकरकि उ उहाँक प्रशंसा हुइना काम कैक आपन जीवन बिताइल। आब परमेश्वरक सामुन्नेम वाकर एकदम खुसिसे स्वागत हुइयाबाटस ओ प्रभु ओहीह असिक कहुइयाबाट, “तँ इमान्दार ओ असल जीवन बिताइया, तँ धन्यक हुइट्या, तँ डान्चे चिजम फे इमान्दार हुइल्या, उहओसे आब तँ धेर चिजम जिम्मा पैब्या। परमेश्वरक आघ आब खुसिसे आनन्द मना।” आब वाकर जीवनम शैतानक कुछ शक्ति चलुइया नैहुइटस काकरकि “परमेश्वरक नजरम उहाँक मनैन्हक मृत्यु अमूल्य बा।”

“दोस्र मै स्वर्गमसे असिक कहट् सुन्तुँ, ‘यी लिखो, आबठेसे मुना सब विश्वासीहुँक धन्यक हुइटा। परमेश्वरक आत्मा का कठ कलसे हुँक आपन-आपन परिश्रमम आराम पैहीं, काकरकि हुँकन्हक काम हुँकन्हके पाछ लगुइयाबाटन।”

अन्तिम उपदेश

प्रिय पाठकहुँक, अप्णहुँक आपन मन परमेश्वरह सुम्प्यादी। उहाँ अप्णह प्रेम कठ काकरकि उहाँ अप्णहुँकन असिक कठ, “हेरो लकोँ, टुन्हक मन म्वारओर लगाओ।” अप्ण आपन हुक्क हुइल्, निराशले भरल ओ दुखित मन येशूह दी त उहाँ अप्णह लौव मन ओ लौव आत्मा देहुइयाबाट। अप्ण आपन पापी मनक हिसाबले जीवन जीक आपन जीन्दगीह बर्बाद जिन पारी काकरकि “आपन मनम भर पर्ना मनै मूर्ख हुइट, तर बुद्धिमान हिसाबले चलुइयन जीवन पैठा।” पाप कर छोरदी ओ परमेश्वरसे बलगर सम्बन्धम बनाई “काकरकि पापक ज्याला मृत्यु हो तर परमेश्वरक वरदान हमार प्रभु येशूकम अनन्त जीवन हो।”

अपन येशू ख्रीष्टकम विश्वास कैक आपन जीवन परमेश्वरकम सुम्परखली। अपन एकदम मजा कर्ली। येशूक चेला पावल असिक कैरखल, “काकरकि मै क्याकरम विश्वास कैरखनु कना बात मै जन्हुँ ओ उहाँ म्वार जीवनह सुरक्षा देहसेकठ।” अपन आपन विश्वास पकलरही ओ परमेश्वरक प्रेमम पलरही ओ परमेश्वरक आत्मक सहायताले प्रार्थना करी। येशू डगर, सत्य ओ जीवन हुइट। उहाँ “राजन्हक राजा ओ प्रभुन्हक प्रभु हुइट” ओ विश्वासीहुँकन लिह फेदोस्र अइटीबाट।

अपनहुँकन्हक रक्षा करुइया येशू प्रभु अपनहुँकन पवित्र बनाइ ओ स्वर्गम लैजाइसेकठ। आब हमन मुक्ति देहुइया प्रभु येशूह आदर, भक्ति, स्तुती, प्रशंसा, ओ जयजयकार सड्भर ह्वाए।